

## EDITORIAL

A cuestión do planeamento prospectivo en Galicia vén ocupando un lugar de destaque nas preocupacións da liña editorial desta publicación. Adicáronse lle tres números monográficos nos tres últimos anos. Hoxe, retornamos sobre esta cuestión cun traballo que sostén que o comportamento da Administración Pública resulta o gran determinante da evolución futura do país. Isto insiste na importancia da misión das Administracións Públicas, do seu programa de actuación, do seu estilo e sensibilidade.

Se comparamos os resultados do estudio de prospectiva que publicamos cos do *Plan Económico e Social de Galicia, 1993-1996* topámonos con que os máis dos problemas considerados clave do PES serían "falsos problemas" ou "resultados". Isto ten bastante relevo cando se trata de determina-la misión das Administracións Públicas, especialmente da Xunta e dos Concellos. Aínda que calquera estudio prospectivo é sempre cuestionable, parcial e provisorio, sempre suxeito a unha nova discusión; e aínda que o costoso *Plan Económico e Social de Galicia 1993-1996* dormita nos andeis dalgúns despachos sen compromete-la actuación da Administración, desde o noso punto de vista entendemos que só unha visión prospectiva permite dirixir ben os esforzos e confronta-lo futuro con confianza.

Conseguir que as Administracións Públicas teñan un estilo de actuación á altura das súas misións e racionalidade levanta retos intelectuais e institucionais moi difíciles e moi necesarios hoxe. Trataremos de incorporar estas preocupacións na liña editorial desta publicación a partir de agora. Pero sobre todo é necesario un compromiso de cidadanía.

